

摛藻堂四庫全書薈要

集部

欽定四庫全書叢要

集部

漢魏六朝百三家集卷一百八



詳校官候選知縣臣吳南華

欽定四庫全書  
晉書要卷一萬九千七百一  
集部

漢魏六朝百三家集卷一百八

明 張溥 輯

溫子昇集

詔

為魏莊帝閻闔門赦詔

蓋天道忌盈人倫嫉惡疎而不漏刑之無捨是以呂霍之門禍譴所伏梁董之家咎徵斯在頃孝昌之末天步

孔艱女主亂政監國無主余朱榮爰自晉陽同憂王室  
義旗之建大會盟津與世樂推共成鴻業論其始圖非  
無勞效但致遠恐泥終之實難曾未崇朝豺聲已露河  
陰之役安忍無親王公卿士一朝塗地宗戚靡遺內外  
俱盡假弄天威殆危神器時事倉卒未遑問臯尋以葛  
賊橫行馬首南向捨過責成用平醜虜及元顥問鼎大  
駕北巡復致勤王展力行所以此論功且可補過既位  
極宰衡地踰齊魯容養之至豈復是過但心如猛火山

林無以供其暴意等漏卮江河無以充其溢既見金革  
稍寧方隅漸泰不推天功專為己力與奪任情臧否肆  
意無君之跡日月以甚拔髮數罪蓋不足稱斬竹書愆  
宜云能盡方復託名朝宗陰圖釁逆睥睨天居窺覩聖  
厯乃有裂冠毀冕之心將為拔本塞源之事天既厭亂  
人亦悔禍同惡之臣密來投告將而必誅罪無容捨又  
玄天穆宗室末屬名望素微遭逢際會頗參義舉不能  
竭其忠誠以奉家國乃復棄本逐末背同即異為之謀

主成彼禍心是而可憲孰不可恕並以伏辜自貽伊戚元惡既除人神慶泰便可大赦天下

為莊帝生皇太子赦詔

有國三善事屬元良本枝百世義鍾繼體朕應天纂命握圖受籙景祚維新十年以永今月吉辰皇子誕育彩雲映日神光照殿方開博望將起龍樓遠近同歡人神共悅便可大赦天下

為魏帝遷都拜廟鄴宮赦詔

建國所先理屬於宗廟立事為大禮歸於禋祀大丞相  
渤海王神武命世重匡頽歷導塞源於將竭扶神器於  
已傾立天地之大功成人臣之重義朕以冲昧猥當樂  
推關路多虞衿帶難固瞻言往事取則前修乃襲去鄆  
用追遷毫定鼎鄴都卜世惟永民用子來功成不日今  
清廟初興闕宮始就靈祇萃止祖考來格神光夜照香  
氣朝聞今月吉辰躬展誠敬時和氣婉景麗雲葉四表  
來庭萬國在位哀樂相交感慶兼集固宜觀象雷雨布

寬大之恩取類澤風申肆眚之令可大赦天下

赦

天平元年被命作答齊神武敕

高歡擁立魏孝武於洛陽自歸鄴都已斛斯  
椿構帝漸與歡隙封隆之孫騰亡奔歡洩其  
謀帝規欲討歡假稱將伐句吳且備宇文賀  
拔歡亦表稱勒兵四道伏聽處分仍申信誓  
云為嬖倖所間一旦賜疑若負陛下身受天  
殃子孫殄絕一二佞臣願斟量廢出帝命舍  
人溫子昇草敕答之子昇逡巡未  
敢作帝據胡床拔劔作色乃遣筆

前持心血遠以示王深冀彼此其相體悉而不良之徒

坐生間貳近孫騰倉卒向彼致使間者疑有異謀故遣  
御史中尉綦雋且申朕懷今得王啟言誓懇惻反覆思  
之猶所未解以朕眇身遇王武略不勞尺刃坐為天子  
所謂生我者父母貴我者高王今若無事背王規相攻  
討則使身及子孫還如王誓皇天后土實聞此言近慮  
宇文為亂賀拔勝應之故纂嚴欲與王俱為聲援宇文  
今日使者相望觀其所為更無異迹賀拔在南開拓邊  
境為國立功念無可責君若欲分謗何以為辭東南不

賓為日已久先朝以來置之度外今天下戶口減半未宜窮兵極武朕既闇昧不知倭人是誰可列其姓名令朕知也如聞庫狄干語王云本欲取懦弱者為主王無事立此長君使其不可駕御今但作十五日行自可廢之更立餘者如此議論自是王間勲人豈出倭臣之口去歲封隆之背叛今年孫騰之逃走不臯不送誰不怪王騰既為禍始曾無愧懼王若事君盡誠何不斬送二首王雖啟圖西去而四道俱進或欲南渡洛陽或欲東

臨江左言之者猶應自怪聞之者寧能不疑王若守誠  
不貳晏然居北在此雖有百萬之衆終無圖彼之心王  
脫信邪棄義舉旗南指縱無匹馬隻輪猶欲奮空拳而  
爭死朕本寡德王已立之百姓無知或謂實可若為他  
所圖則彰朕之惡假令還為王殺幽辱墮粉了無遺恨  
何者王既以德見推以義見舉一朝背德舍義便是過  
有所歸本望君臣一體若合符契不圖今日分疎到此  
古語云越人射我笑而道之吾兄射我泣而道之朕既

親王情如兄弟所以投筆拊膺不覺歔欷

表

魏帝納后羣臣上禮文表

臣聞軒轅乃至西陵以之作合夏后至聖塗山于是來  
賓伏惟陛下龍飛纘歷大明理運長秋既建陰教有主  
景命無窮靈基長世普天之下莫不欣躍

西河王謝太尉表

臣聞拂羽決起力謝摩天策蹇載馳功微送日將短翮

難以陵高駕乘無由致遠雖復建旗出郡未追楚趙之  
風捧壺入侍徒踵金張之迹及天祚明德運啟興王六  
遂始遷九鼎初定於焉承乏有用當官草靡從風未遑  
克讓常恐執轡傾輪操刀傷錦

為司徒高敎曹謝表

委水橫流羣龍交戰徒悲道喪空懷主辱雖復見義援  
戈臨危奮劖顧慙後劙終謝先鞭事等泣河無救三川  
之竭有類憂天豈支四極之壞

為臨淮王謝封開府尚書令表

臣道愧山東氣慙隴右激水弗功搏風無力但以平原  
帶地資緒極天發趾自高理翩以遠出臨侯服既乏刺  
舉之能入踐帝闈又無應對之美空復受戈清廟推轂  
朱門孝闕淚河功慚汗海大寶遠降橫草未樹顧以有  
涯願言知止

為南陽王讓尚書表

臣聞立而託乘乃成致遠之功坐以運舟遂有利涉之

用若以輕任重課憑虛責實雖欲自勤終焉靡効

為上黨王穆讓太宰表

臣聞策蹇長途終慚一日之致懸縷層臺詎任千鈞之重固知才弱不可自強力微難以企及智小謀大恐貽折足之憂才輕任重懼有絕贖之悔既慮鑠金固陳匪石

為廣陵王讓吏部尚書表

假勢風雲非由羽翮徒得推遷就列偪俛當官曾無辟

雍議禮之名詎有銅雀獻賦之敏而政本實繁司會尤  
切抑揚智地用舍時流實當年之準的乃一世之權衡  
得其人則分職之任隆非其才則曠官之失起

為安豐王延明讓國子祭酒表

臣聞寶劍未砥猶乏切玉之功美箭闕羽尚無衡石之  
勢况才非會稽之竹質謝昆吾之金至於敷敎東序流  
訓上庠置樽侯酌懸鐘待叩必湏蘊朱藍以成彩立規  
矩以為式垂三行於貴游揚六藝於胄子而臣學愧聚

沙問慚攻木雖歷文史不治章句於茲曠官青衿何仰  
為廣陽王北征請大將表

今四郊多壘三軍申發率土之濱莫敢寧晏况忝末屬  
復董元戎臣不盡心誰將竭力豈容飾讓苟違戎重但  
以軍旅之事實所未學求保重將隨方指麾臣請先驅  
被堅督戰若使旗鼓相望埃塵相接決機兩陣之間不  
辭萬死之地脫獨委臣專總戎旅兵術靡常軍機屢變  
以臣當之必所未達雖奉廟算有均膠柱

上書

為廣陽王淵上書

淵為北道大都督受尚書令李崇節度

時東道都督崔暹敗於白道淵上書

邊豎構逆以成紛梗其所由來非一朝也昔皇始以移  
防為重盛簡親賢擁麾作鎮配以高門子弟以死防遏  
不但不廢仕宦至乃偏得復除當時人物忻慕為之及  
太和在歷僕射李沖當官任事涼州土人悉免廝役豐  
沛舊門仍防邊成自非得罪當世莫肯與之為伍征鎮

驅使但為虞侯白直一生推遷不過軍主然其往世房  
分留居京者得上品通官在鎮者便為清途所隔或投  
彼有北以御鼉魅多復逃胡鄉乃峻邊兵之格鎮人浮  
遊在外皆聽流兵捉之於是少年不得從師長者不得  
遊宦獨為匪人言者流涕自定鼎伊洛邊任益輕唯底  
滯凡才出為鎮將轉相模習專事聚斂或有諸方姦吏  
犯罪配邊為之指蹤過弄官府政以賄立莫能自改咸  
言姦吏為此無不切齒憎怒及阿那瓌背恩縱掠竊奔

命師追之十五萬衆度沙漠不日而還邊人見此援師便自意輕中國尚書令臣崇時即申聞求改鎮為州將允其願抑亦先覺朝廷未許而高闕戍主率下失和拔陵殺之為逆命攻城掠地所見必誅王師屢北賊黨日盛此段之舉指望銷平其崔暹隻輪不及臣崇與臣逡巡復路今者相與還次雲中馬首是瞻未便西邁將士之情莫不解體今日所慮非止西北將恐諸鎮尋亦如此天下之事何易可量

為廣陽王淵上書

往者元乂執權移天徙日而徽託附無翼而飛今大明反政任寄唯重以徽褊心銜臣切骨臣以疎滯遠離京輦被其構阻無所不為然臣昔不在其後自此以來翻成陵谷徽遂一歲八遷位居宰相臣乃積年淹滯有功不錄自徽執政以來非但抑臣而已北征之勲皆被擁塞將士告捷終無片賞雖為表請多不蒙遂前留元標據於盛樂後被重圍析骸易子倒懸一隅嬰城二載賊

散之後依階乞官徵乃盤退不允所請而徐州下邳成  
主賈勳法僧叛後蹙被圍逼固守之勳比之未重乃立  
得州即授開國天下之事其流一也功同賞異不平謂  
何又驃騎李崇北征之日啟募八州之人聽用關西之  
格及臣在後依此科賞復言北道征者不得同於關西  
定襄陵廟之至重平城守國之要鎮若計北而論功亦  
何負於秦楚但以嫉臣之故便欲望風排抑然其當途  
以來何直退勲而已但是隨臣征者即便為所嫉統軍

袁叔和曾經省訴徽初言有理又聞北征隸臣為統應時變色復令臣兄子仲顯異端訟臣緝緝翩翩謀相誹謗言臣惡者接以恩顏稱臣善者即被嫌責甄琛曾理臣屈乃視之若仇讐徐紇頗言臣短即待之如親戚又驃騎長史祖瑩昔在軍中妄增首級矯亂戎行蠹害軍府獲罪有司避命山澤直以謗臣之故徽乃還雪其辜臣府司馬劉敬比送降人既到定州翻然背叛賊如決河豈其能擁且以臣府參察不免身首異處徽既怒遷

捨其元惡及胥徒從臣行者莫不悚懼頃恒州之人乞  
臣為刺史徽乃裴然言不可惻及降戶結謀臣頻表啟  
徽乃因執言此事及向定州遠彼姦惡又復論臣將有  
異志翻覆如此欲相陷沒致令國朝遽賜遷代賊起之  
由誰使然也徽既優幸任隆一世慕勢之徒於臣何有  
是故餘人攝選車馬填門及臣居邊賓遊罕至臣近北  
為慮其為梗是以致致乞赴京闕屬流人舉斧元戎垂  
翅復從後命自安無所備俛先聽不敢辭事及臣出都

行塵未滅已聞在後復生異議言臣將兒自隨證為可疑之兆忽稱此以構亂悠悠之人復傳音響言左軍臣融右軍臣衍皆受密敕伺察臣事徽既用心如此臣將何以自安竊以天步未夷國艱猶梗方伯之任於斯為急徽昔臨蕃乃有人譽及居端右蔑爾無聞今求出之為州使得申其利用徽若外從所長臣無內慮之切脫

蒙闕公私幸甚

銘

## 鐘銘

宮商遍變律呂相生立號則起從草以成調之必應擊而不橫銅盤韻響火鳥和聲出入成則明宵有數

碑

## 舜廟碑

懷山不已龍門未闢大道御世天下為公感夢長人明  
敷仄陋釐降二女結友九男執耜歷山耕夫所以讓畔  
施罟雷澤漁父於是讓川亦既登庸以之納錄九官咸

事百揆時叙有大功於當世集歷數而在躬受文祖之  
命致昭華之玉班五瑞於羣后禋六宗於上玄舞干戚  
而遠夷賓弃金璧而幽靈應青雲浮洛榮光塞河符瑞  
必臻休祥咸萃以君人之大德為帝王之稱首陟方之  
駕遂往蒼梧之空不歸爰自先民實存舊廟既緝薦房  
遂鎮瑤席龍駕帝服蓋依俙於慕舜交鼓組瑟實髡鬚  
於聞韶其辭曰

虹氣降靈姚墟誕聖樹陰未陟帝圖已定乃賓四門以

齊七政天眷功高民歸德盛治既蕩蕩化亦巍巍南風  
在詠西環有歸巖山永逝湘水長違靈宮肅肅神館微

微

寒陵山寺碑

昔晉文尊周績宣於踐土齊桓霸世威著於邵陵並道  
冠諸侯勲高天下衣裳會同之所兵車交合之處寂莫  
消沈荒涼磨滅言談者空知其名遙遇者不識其地然  
則樹銅表跡刊石記功有道存焉可不尚與永安之季

數鍾百六天災流行人倫交喪余朱氏既絕彼天綱斷  
茲地紐祿去王室政出私門銅馬競馳金虎亂噬九嬰  
暴起十日並出破璧毀珪人物既盡頭會箕歛杼軸其  
空大丞相渤海王命世作宰惟機成務標格千仞崖岸  
萬里運鼎阿于襟抱納山岳於胸懷擁玄雲以上騰負  
青天而高引鐘鼓嘈囁上聞於天旌旗纘紛下盤於地  
壯士凜以爭先義夫憤而競起兵接刃於斯場車錯轂  
於此地轟轟隱隱若轉石之墜高峴琅琅磕磕如激水

之投深谷俄而霧捲雲除冰離葉散靡旗蔽日亂轍滿  
野楚師之敗於柏舉新兵之退自昆陽以此方之未可  
同日既考茲沃壤建此精廬砥石礪金瑩珠琢玉經始  
等於佛功制作同於造化息心是歸淨行攸處神異畢  
臻靈仙總萃鳴玉鸞以來遊帶霓裳而至止翔鳳紛以  
相曜飛龍婉而俱躍雖復高天銷於猛炭大地淪於積  
水固以傳之不朽終亦記此無忘

大覺寺碑

維天地開闢陰陽轉運明則有日月幽則有鬼神初地  
遼遠末路悠長自始及終從凡至聖積骨成山祇劫莫  
數垂衣拂石恒河難計及冠日示夢蒙羅見謁應世降  
神感物開化顏如滿月心若盈泉體道獨悟含靈自曉  
居三殿以長想出四門而永慮聲色莫之留榮位不能  
屈道成樹下光燭天上變化靡窮神通無及置湏彌於  
華蓋納世界於微塵闢慈悲之門開仁壽之路拯煩惱  
於三塗濟苦難於五濁非但化及天龍教被人鬼固亦

福霑行鴈道洽遊魚但羣生無感獨尊罷應雜色照爛  
諸山搖動布金沙而弗受建寶蓋而未留遂上微妙之  
臺永升智慧之殿而天人慕德象法興靈圖影西山承  
光東壁主上乃據地圖攬天鏡乘六龍朝萬國牢籠宇  
宙襟帶江山道濟橫流德昌頽歷四門穆穆百僚師師  
乘法船以徑度駕天輪而高舉神功寶業既被無邊鴻  
名懋實方在不朽抵掌措言雖不盡意執筆書事其能  
已乎

印山寺碑

自結繩運往觀象代興禮樂相因詩書間出喻是非於一指論道德於二篇九流之義遂開百家之言並作皆以賦命有遭隨攝養致天壽愛惠起於吉凶情偽動於利害雖改張羅之咒未易釁鐘之牲因果之業未申感應之途猶蔽是以修短有命子夏論之而未詳報施在天史遷言之而未悟大丞相渤海王膺岳瀆之靈感辰象之氣直置與蘭桂齊芳自然共珪璋比潔加以體備

百行智周萬象道兼語嘿思極天人固以兆云非虎自懷公輔之德世稱卧龍實任王佐之器道足以濟天下足以通神明表立人之上才舍廣途之大量永安之末時多異謀蜂蠭之毒豺狼反噬穀弩臨城抽戈犯蹕世道交喪海水羣飛既而蒼龍入隱白虎出見命世有期匡時作宰拯沉溺以援手涉波瀾而濡足懸瞰日於胸懷起大風於襟袖動之以仁義行之以忠貞附之者影從應之者響起

定國寺碑

蓋兩儀交運萬物並生始自苦空終於常樂而緣障未  
開業塵猶擁漂淪欲海顛墜邪山雖復光華並於日月  
術數窮於天地有扶危定傾之力為濟世夷難之功登  
途山而未歸遊建水而不反並馳於苦樂之境皆入於  
生死之門幽隱長夜未覩山北之燭沈迷遠路詎見司  
南之機昔日先民雖云善誘尚習蓋纏未能解脫見如  
八卦成象示之以吉凶百藥為醫道之以利害衣食有

業民免饑寒之憂水土既平人無墊溺之患斯誠事周  
於世用功濟於生民不論過去之因緣詎辨未來之果  
報惟無上大覺均悟玄機應現託生方便開教聖靈之  
至無復等級威神之力不可思議動三乘之駕汎八解  
之流引諸子於火宅渡羣生於海岝自一音輶響雙樹  
潛神智慧雖徂象法猶在光照金盤言留石室徧諸世  
界咸用歸仰

常山公主碑

啟泰微之層構闢閭闔之重扉據天下以為家苞率土  
而光宅然則昆山西峙爰有夜光漢水東流是生明月  
公主稟靈宸極資和天地芬芳有性溫潤成質自然祕  
遠若上元之隔絳河直置清高類姮娥之依桂樹令淑  
之至比光明於宵燭幽閒之盛匹穠華於桃李託體宮  
闈而執心撫順婉然左辟率禮如賓舉華燭以宵征動  
鳴佩而晨去致肅雍於車乘成好合於琴瑟立行潔於  
清冰抗志高於黃鸝停輪表信闔門示禮終能成其子

姓貽厥孫謀而鐘漏相催日夜不息川有急流風無靜  
樹奄辭身世從宓妃於伊洛遽捐館舍追帝子於瀟湘銘  
曰

龍轡莫援日車遂往奄離形神忽歸丘壤祖歌薤露出  
奏巫山永厝中野終掩窮泉蕭瑟神道荒涼墓田松櫓  
徒列琬琰空傳

墓志銘

司徒元樹墓誌銘

昔樞電降祥姬水成業握八符以馭世膺五命以會昌  
欽明格於上下光澤被於宇宙卜年永久歷世遐長有  
文王之孫子啟周公之苗裔積善所及踵武稱賢每以  
辛李為言恒持韓白自許殫百慮之一致盡能事於生  
民蒼蒼在上義歸無厚徒有東平避世之意空懷北海  
自晦之情疾非逢霧終異啟手銘曰

明允篤誠發於岐嶷未鏤已雕不扶而直修禮以耕強  
學為殖孔既歎魯莊亦吟越况以度思有懷明發翻然

高舉歸於魏闕長路未窮朝光已沒

司徒祖瑩墓志

自天命生商王居徙毫源源毖遠枝葉繁華祖德潤於  
身聲高邦國父行成於己名重京師公鍾美多福資神  
積善器局閑靈志識開悟口含碧雞之辨手握雕龍之  
文門有善業家傳慶靈礪金成器相遺滿簷琢玉為寶  
待價聯城匪直也人實惟有道言析秋毫辭連春藻

文

閭闈門上梁祝文

維王建國配彼太微大君有命高門啟扉良辰是簡穆  
卜無違雕梁乃架綺翼斯飛八龍杳杳九重巍巍居宸  
納祐就日垂衣一人有慶四海攸歸

樂府

白鼻騮

少年多好事攬轡向西都相逢狹斜路駐馬詣當壚

結襪子

誰能訪故劍會自逐前魚裁紈終委篋織素空有餘

安定侯曲

封疆在上地鐘鼓自相和美人當窻舞妖姬掩扇歌

燉煌樂

客從遠方來相隨歌且笑自有燉煌樂不減安陵調

涼州樂歌二首

遠遊武威郡遙望姑臧城車馬相交錯歌吹日縱橫  
路出玉門闕城接龍城坂但事絃歌樂誰道山川遠

擣衣

長安城中秋夜長佳人錦石擣流黃香杵紋砧知近遠傳聲遞響何淒涼七夕長河爛中秋明月光蠟螭塞邊絕候鴈鴛鴦樓上望天狼

詩

從駕幸金墉城

茲城實佳麗飛甍自相並膠葛擁行風岩窓閥流景御溝屬清洛馳道通丹屏湛淡水成文參差樹交影長門

久已閉離宮一何靜細草緣玉階高枝蔭桐井微微夕  
渚暗蕭蕭暮風冷神行楊翠旗天臨肅清警伊臣從下  
列逢恩信多幸康衢雖已泰弱力將安騁

春日臨池

光風動春樹丹霞起暮陰峩峩映連璧飄飄下散金徒  
自臨濠渚空復撫鳴琴莫知流水曲誰辨遊魚心

詠花蝶

素蝶向林飛紅花逐風散花蝶俱不息紅素還相亂芬

芬共襲手葳蕤從可玩不慰行客心遽動離居歎

相國清河王挽歌

高門詎改轍曲沼尚餘波何言吹樓下翻成薤露歌

漢魏六朝百三家集卷一百八

欽定四庫全書  
漢魏六朝百三家集要卷一百九

集部

漢魏六朝百三家集卷一百九

明 張溥 輯

邢邵集

賦

新宮賦

擬二儀而構路寢法三山而起翼室何大廈之耽耽而  
斯干之秩秩豈西京之足偉故東都之所匹爾其狀也

則瓊譎屈奇瀾漫陸離嵯峨崔嵬巉巖參差若密雲之  
乍舉似鵬翼之中垂布菱華之與蓮蒂咸反植而倒施  
若承露而將轉似含風而欲披土成黼黻木化蛟螭布  
紅紫之融洩間朱黃之赫曦獸狂顧而猶動鳥欲騫而  
以疲木神水怪海若山祇千變萬化殊形異宜陰梁北  
注陽鳥南施百楹列倚千櫨代支或據險而形固或居  
安而勢危

詔

為齊文宣受禪赦詔

無德而稱代刑以禮不言而信先春後秋故知惻隱之化天人一揆弘宥之道今古同風朕以寡薄功烈無紀昔先獻武王值魏世不造四海幅裂九鼎行出祭器無歸乃驅御侯伯大號燕趙拯厥顛墜俾亾則存文襄王外挺武功內資明德纂成先業闢土服遠年逾二紀世歷兩都獄訟有適謳歌斯在魏帝俯遵厯數念在褰裳遠取唐虞終同脫屣實幽憂未已志在陽城而羣公卿

士誠守愈切遂屬代終居於民上如涉深水有睠終朝  
始發晉陽九尾呈祥升壇告天赤雀效祉惟爾文武不  
二之臣股肱爪牙之將左右先王光隆大業永言誠烈  
共茲休慶然三皇存教非易可免七名改呪庸可庶幾  
思共億兆同始茲日其大赦天下

表奏

百官賀平石頭表

大江設隘實限夷華前魏觀濤而退後魏登山而反聲

教不通多歷年代今蒼雉奉職靈鼈自梁折葦為舟憑  
力可渡始知德通於物孟門失險道清將順劒閣自開  
行舉洞庭之樂放畜長洲之苑會玉帛於塗山樹銅柱  
於南極

賀老人星表

冥覲未已靈應猶臻以某夜老人星見達旦揚光經旬  
未滅雖三星共色五老同遊擬之於此故無與匹自非  
玄風感極聖敬迴天何能使休徵秘祉相尋而至故以

朝夕相趨史無停筆

為文襄讓尚書令表

揚職萬幾總任百揆懸衡庶物準納羣僚何以助日月之光華增天地之高厚反鑒取照匹此何難倒裳求領方之為易

又表

正以晝覽太山不假秋毫之察夜仰列宿豈藉燭龍之明爵人以世既非盛德之舉公門有私故是陵夷之運

為李衛軍以國子祭酒讓東平王表

臣聞運舟歸於積水致遠在於逸足未有涓澗之流可成奔飛之用駕蹇之乘而有滅沒之功既列趙衰先人之敏請同虞丘退身之義具官臣某民望時宗聲實攸在斧藻川流雕篆霞蔚蕉蒲既茂枝葉實繁故以學窮齊魯聲高梁魏詔美司朝僉諧允在伏願迴恩徙授以

答具瞻

為彭城王韶讓侍中表

韶韻映首日月在躬冠蓋庶僚跨躡多士雖智慚量力  
明闢自知在梁之譏無得誼華之議素殞之責豈須尊  
嗜之口何悟天之情眷復延今寵遂總錄百揆寅亮萬  
機文昌治本得失所繫用才長短隆替以之何容以斯  
寡薄豈得用膺茲忝

為潘司徒樂讓表

武皇帝運屬繼元事深微禹推蚩尤之陣破尋邑之師  
義開金石理勗庸駘遂日奉羈勤有事風塵徒備鳥背

之毛曾無馬箠之力

為司空景讓表

屬平分廣施造物多品長短入用小人見収連采台階  
堪均鼎足昨者謫見垂象災起潛伏此之為累非直微  
躬

請置學及修立明堂奏

世室明堂顯於周夏一黌兩學盛自虞殷所以宗配上  
帝以著莫大之嚴宣布下土以彰則天之軌養黃髮以

詢哲言育青衿而敷教典用能享國長久風徽萬祀者也爰暨亡秦改革其道坑儒滅學以蔽黔黎故九服分崩祚終二代炎漢勃興更修儒術故西京有六學之義東都有三本之盛逮自魏晉撥亂相因兵革之中學校不絕仰惟高祖孝文皇帝稟聖自天道鏡今古列校序於鄉黨敦詩書於郡國但經始事殷戎軒屢駕未遑多就弓劍弗追世宗統歷聿遵先緒永平之中大興版築續以水旱戎馬生郊雖逮為山還停一簣而明堂禮樂

之本乃鬱荆棘之林膠序德義之基空盈牧豎之跡城  
隍嚴固之重闕壘石之功墉構顯望之要少樓榭之飾  
加以風雨稍侵漸致虧墜非所謂追隆堂構儀刑萬國  
者也伏聞朝議以高祖大造區夏道侔姬文擬祀明堂  
式配上帝今若基址不修仍同丘畝即使高皇神享闕  
於國陽宗事之典有聲無實此臣子所以匪寧億兆所  
以佇望也臣又聞官方授能所以任事事既任矣酬之  
以祿如此則上無曠官之譏下絕尸素之謗今國子雖

有學官之名無教授之實何異兔絲鷺麥南箕北斗哉  
昔劉向有言王者宜興辟雍陳禮樂以風天下夫禮樂  
所以養人刑法所以殺人而有司勤勤請定刑法至於  
禮樂則曰未敢是敢於殺人不敢於養人也臣以為當  
今四海清平九服寧晏經國要重理應先營脫復稽延  
則劉向之言徵矣但事不兩興須有進退以臣愚量宜  
罷尚方雕靡之作頗省永寧土木之功并減瑤光材瓦  
之力兼分石窟鐫琢之勞及諸事役非世急者三時農

隙修此數條使辟雍之禮蔚爾而復興諷誦之音煥然  
而更作美榭高墉嚴壯於外槐宮棘寺顯麗於中更明  
古今重遵鄉飲敦進郡學精課經業如此則元凱可得  
之於上序游夏可致之於下國豈不休歟

書

答袁肇修書

魏齊世臺郎多交通餼遺肇修在尚書十年  
未曾受升酒之饋邵時為尚書與肇修有舊  
每於省中語戲常呼肇修為清郎大寧初肇  
修以太常少卿出使巡省經歷兗州時邵為

兗州刺史別後遣送白紬為  
信肇修不受與邵書邵答之

一日之贈率爾不思老夫忽忽意不及此敬承來旨吾  
無間然第昔為清郎今日復作清卿矣

遺辛術書

術魏末遷東徐州刺史為淮南經略使齊天  
保元年睢州刺史及所部郡守俱犯大辟朝  
廷以其奴婢百口及資財盡賜術三辭不  
許術乃送所司不復聞奏邵聞遺術書

昔鍾離意云孔子悲渴於盜泉便以珠璣委地足下今  
能如此可謂異代一時

序

蕭仁祖集序

蕭仁祖之文可謂雕章間出昔潘陸齊軌不襲建安之風顏謝同聲遂革太元之氣自漢逮晉情賞猶自不諧河北江南意製本應相詭

議

皇太子東西議

天保元年皇太子監國在西林園冬會羣議  
皆東面二年於北城第內冬會又議東面陸

印疑非禮魏叔改為西面邢子才議欲依前

凡禮有同者不可令異詩說天子至於大夫皆乘四馬  
况以方面之少何可皆不同乎若太子定西面者王公  
卿大夫士復何面耶南面人君正位今一官之長無不  
南面太子聽政亦南面坐議者言皆晉舊事太子在東  
宮西面為避尊位非為向臺殿也子才以為東晉博議  
依漢魏之舊太子普臣四海不以為嫌又何疑於東西  
禮世子絕旁親世子冠於阼冢子生接以太牢漢元著

令太子絕馳道此皆禮同於君又晉王公世子攝命臨  
國乘七旒安車駕用三馬禮同三公近宋太子乘象輶  
皆有同處不以為嫌况東面者君臣通禮獨何為避明  
為向臺所以然也近皇太子在西林園在於殿猶且東  
面於北城非宮殿之處更不得耶諸人以東面為尊宴  
會避按燕禮燕義君位在東賓位則在西君位在阼階  
故有武王踐阼篇不在西也禮乘君之車不敢曠左君  
在惡空其位左亦在東不在西也君在阼夫人在房鄭

注人君尊東也前代及今皇帝宴會接客亦東堂西面若以東面為貴皇太子以儲后之禮監國之重別第宴臣賓自得申其正位禮者皆東宮臣屬公卿接宴觀禮而已若以西面為卑實是君之正位太公不肅北面說丹書西面則道之西面乃尊也君位南面有東有西何可皆避且事雖少異有可相比者周公臣也太子子也周公為冢宰太子為儲貳明堂尊於別第朝諸侯重於宴臣賓南面貴於東面臣疎於子冢宰輕於儲貳周公

攝政得在明堂南面朝諸侯今太子監國不得於別第  
異宮東西宴客情所未安且君行以太子監國君宴不  
以公卿為賓明父子無嫌君臣有嫌案儀注親王受詔  
冠婚皇子皇女皆東面今不約王公南面而獨約太子  
何所取耶議者南尊改就西面轉君位更非合禮方面  
既少難為節文東西二面君臣通用太子宜然於禮為  
允

宮吏之姓與太子同名議

案曲禮大夫士之子不與世子同名鄭注云若先之生亦不改漢法天子登位布名於天下四海之內無不咸避案春秋經衛石惡出奔晉在衛侯衎卒之前衎卒其子惡始立明石惡於長子同名諸侯長子在一國之內與皇太子於天子禮亦不異鄭言先生不改善以此義衛石惡宋向戌皆與君同名春秋不譏皇太子雖有儲貳之重未為海內所避何容便改人姓然事有消息不得皆同於古宮吏至微而有所犯朝名從事亦是難安

宜聽出宮尚書更補他職

改革葬服議

王元軌子欲改革葬祖及祖母  
列上未知所服子才議曰

禮改革總麻鄭玄注臣為君子為父妻為夫唯三人而已然嫡曾孫孫承重者曾祖父母祖父母改葬既並三年之服皆應服總而止言三人若非遺漏便是舉其略耳

訊因議

準舊皆評因取占然後  
送付廷尉邵以為不可

設官分職各有司存丞相不問鬪人虞官弓招不進豈使尸祝兼刀弋之役家長侵雞犬之功

頌

甘露頌

歷選列辟逖聽前聞三才易統五運相君皇極攸序庶類以分乃忠乃敬或質或文

赫矣景命蒸哉上聖大德莫名至道無競川停岳路雲

臨水鏡望日齊明瞻天比映

功深微禹業隆作周英華內積文教外修廣輪四海提  
封十洲紫川北注赤水南流

寢居兩楹恭已萬國聖敬日漸王猷允塞禮有大成樂  
無慙德用天之道順帝之則

政平民豫歲稔時和九功惟敘九叙惟歌風輪蹕漢毛  
舟沈河玉龜出沼鳴鳳在阿

休徵屢動感極迴天流井委素玉潤冰鮮蜜房下結珠

珥上懸布濩林野灑散旌旗

日月已明宇宙已廓鼓金成詠挹水為樂以為玄黃猶  
參沃若取慰天壤用忘溝壑

銘

文襄金像銘

妙形難象至理希詮形之所極理亦在焉悟茲空假勞  
此蓋纏式圖逞秘用結來緣丹青並飾金玉同鑄神儀  
內瑩寶相外宣圓光照耀映被無邊靈應肸蠁感發大

千鍾福旒纊其永如天歸慶怙恃壽等南山凡厥親類  
宜其永年誠歸妙覺標志上玄託銘在斯曠劫方傳

獻武皇帝寺銘

惟睿作聖有縱自天匡國庇民再造區夏功高伊呂道  
邁桓文雖住止域中而神遊方外影響妙法咫尺天人  
曉夜自分不勞鷄鶴之助六時靡惑非待壺箭之功永  
寄將來傳之不朽詞曰用分行坐以敦戒行苦罪祈福  
傲狠成敬萬國咸亨一人有慶方傳自久是用成詠

碑

廣平王碑

公分氣氤氳稟靈昭晉基構輪奐源流濬遠積石莫之  
方委水不能喻山瀆効神辰鼎降德自天攸縱鬱為時  
宗牆宇淹曠標格秀遠道亞生知德均殆庶日月在躬  
水鏡被物望青松而比秀干白雲而上征侍講金華參  
遊銅雀出陪芝蓋入奉桂室充會友之選當拾遺之舉  
發言為論受詔成文碧鷄自口靈蛇在握方見建安之

體復聞正始之音公年方弱冠而位居寮右道被生民  
惠漸萬物鬱為雅俗之表峩成社稷之鎮公孫聲動天  
下已非其倫管子光照鄰國孰云能擬方謂膺斯多福  
降此永年奪搏風之逸羽窮送日之遠路同岐山之嘉  
會陪岱宗之盛禮而羣飛在辰橫流具及山崩川竭星  
竇日銷崑嶽旣燬玉石俱燼蘭挺則芬玉生則潤泱泱  
萬源落落千仞我有徽猷金聲玉振志猶學海業比登  
山踟躕緹袞絳帳韋編尋微啓奧敷理入玄天地或終

山河匪壽昔日先民誰堪長久立言立事責之身後式  
銘景行是為不朽

冀州刺史封隆之碑

公世載儒雅之風家傳鐘鼎之業出三代而克阜歷兩  
都而轉盛五世祖游游子乎耻斯鳥獸狹此丘壑濡足  
焚首念在一匡委質中山並充袞闕故已援墜拯溺大  
庇生民祖定功業建旆懷藩揚旌冀部耳目相接歌詠  
獨存父司空孝宣公稟潤王府承華桂簿望振鷺而齊

舉軼歸鴻而並運以茲一德光事三主七登九伯之重  
再處八元之任必有餘慶事屬才子莫之與京理歸世  
祿非因原隰之氣詎待河岳之靈發純粹而成址稟中  
和而樹質神體秀異志識間爽幼體成人弱不好弄同  
鳳凰之五色非豫章之七年太昌初平洛除侍中驃騎  
大將軍密勿樞功逶迤袞職貂蟬承弁華藻披衣鳴雙  
璫於峻陞驅六轡於廣路升華輦以弼一人踐泰階而  
平天下

景明寺碑

九土殊方四生舛類昏識異受修短共時德表生民不  
救泰山之朽壞義同列辟豈濟灤水之淪胥漂鹵倒戈  
之勢浮江駕海之力孰不曠息相催飛馳共盡泡沫不  
足成喻風電詎可為言而皆遷延愛欲馳逐生死眷彼  
深塵迷茲大夜坐積薪於火宅負沉石於苦海結習靡  
倦憂畏延長身世其猶夢想榮辱譬諸幻化未能照彼  
因緣體茲空假祛洗累惑擯落塵埃苦器易彫危城難

久自發迹有生會道無上劫代緬邈朕跡遐長草木不能况塵沙莫之比及日晷停流星輶運香雨旁注  
其露上懸降靈迦衛擁迹忍土智出須彌德踰大地道尊世上義重天中銘曰

大道何名至功不器理有罔適法無殊致能以託生降體凡位正覺如遠一念斯在德尊三界神感四大川流自斷火室不然衣生寶樹座踊芳蓮智固有極道暢無

邊

并州寺碑

夫至道密微無跡可覩神功感應有理斯存雖慧日已照而大夜莫曉香雨時流而深塵未息曠劫悠絢歷代遐長眇眇世羅無能免其一目汎汎慾網孰能解其三面自大教遷流行於中土希向之士烟踊沙屬恒沙未足為言積塵所不能喻皆云出沒生死之河浮沉愛欲之海未有矯然獨悟脫落身名望彼岸而攸往汎寶船而利涉

謚議

文宣帝謚議

伏惟聖德光遠神猷弘大初自登庸民譽所集把尺持  
刀成務斯在百揆載清四門唯穆及天眷旣屬人謀所  
歸鳥獸遷情士女革面敬順天人拱揖羣后處無上之  
尊居域中之大禮盛樂修時和歲稔海內有截天下泰  
然猶憂勞億兆經營四國同虞舜之巡省若軒轅之靡  
寧威武紛紜神功四暢怨西以東化南自北臨瀚海以

浴兵登天山而繼馬左紫右拂擬歌成章方朝百神於  
太華受萬國於稽嶺升中增封高拱垂衣而天喪黎庶  
奄捐四海考妣之慕實被含生稱天作誄抑惟恒數故  
以名追實盡物未臻其美屈道從制一日可以成名

哀策文

文宣帝哀策文

皇路啓扉輶敢弛殯八校案部六卿且引攀蜃輶而雨  
泣仰穹蒼而撫心悲風發而地駭愁雲興而景沈哲王

垂範有訓有則式奉誥言光敷令德其辭曰

四象更運九天代名通三以王得一為貞是應玄德實  
啓蒼精風后之陳師尚之兵三奇六合七變五成授戈  
推轂稟律襲行野無完陳邑少堅城經營四海劬勞百  
姓芝蓋夕臨羽旄晨映地不掩瑞天不愛寶旣丹其雀  
又朱其草莫黑已素莫赤自皓百獸斯蹈五靈載擾耳  
露瀼瀼青龍矯矯武功已暢文教未窮方偃烽堠銷戰  
藏弓齊光日月比祚華嵩而氣祲日下星闇虛中奄捐

朝市長棄華戎道宣末命義闡餘風六絳已散九旗方  
卷見容衛之虛歸知平生之日遠同乘雲而永逝異騎  
龍之更反清笳奏兮野風急金鼓震兮日光晚千官悲  
而雨注萬國哀而露泣萬事同盡百慮俱收劍鳥永去  
衣冠自遊音儀已謝神教空留知英聲與至德當無絕  
兮千秋

墓誌

太尉韓公墓誌

立事立言是為勿替上公上德實繫不朽雖將相無種  
而公卿有門是以萬鍾四牡昌奕於往代長組高冠陸  
離於前祀及負笈追陪結友從師先難後易身佚功倍  
皆神遊隅隩理合精微非存甯越廢寢食以存道久殊  
高鳳志冠履以成業皎皎獨照旁絕置淳亭亭孤鶴入  
自雲霞忘情譽毀同嗣宗之於善惡齊心得喪若叔夜  
之於慍喜方將受在三九追蹤二八弘大道以事一人  
敷至理以安百姓而天德不厚神聽多愆仁勇一亡辯

智同盡

李禮之墓誌

食有奇味相待乃餐衣無常主易之而出

樂府

思公子

綺羅日減帶桃李無顏色思君君未歸歸來豈相識

詩

三日華林園公宴

迴鑾自樂野弭蓋屬瑤池五丞接光景七友樹風儀芳  
春時欲遽覽物惜將移新萍已冒沼餘花尚滿枝草滋  
徑蕪沒林長山蔽虧芳筵羅玉俎激水漾金卮歌聲斷  
以續舞袖合還離

冬夜酬魏少傳直史館

年病從橫至動息不自安兼豆未能飽重裘詎解寒况  
乃冬之夜霜氣有餘酸風音響北牖月影度南端燈光  
明且滅華燭新復殘衰顏依候改壯志與時闌體羸不

盡帶髮落強扶冠夜景將欲近夕息故無寃忽有清風  
贈辭義婉如蘭先言歎三友次言慙一官麗藻高鄭衛  
專學美齊韓審諭一作喻雖有屬筆削少能干一作刊高足

自無限積風良可搏空想青門易寧見赤松難寄語東  
山道高駕且盤桓

冬日傷志篇

昔時惰遊士任性少矜裁胡驅一作馳瑪瑙勒夕銜熊耳

杯折花步淇水撫琴望叢臺繁華夙昔改衰病一時來

重以三冬月愁雲聚復開天高日色淺林勁鳥聲哀終  
風激簷宇餘雪滿條枚遨遊昔宛洛踟蹰今草萊時事  
方去矣撫已獨傷懷一作懷哉

七夕

盈盈河水側朝朝長歎息不愴漸衰苦波流詎可測秋  
期忽云至停梭理容色束衿未解帶迴鑾已沾軾不見  
眼中人誰堪機上織願逐青鳥去慙因希羽翼

齊韋道遜晚春宴

日斜賓館晚風輕  
夢候初簷喧巢幕  
燕池躍戲蓮魚石  
聲隨流響桐影傍巖疎  
誰能千里外獨寄八行書


應詔井露詩

且漸洽凝液汭  
於旗草木盡霑被  
玉散復珠霏誰  
昊遠道合若應機

賀老人星詩

瑞動星光照化穆  
月輪重庶徵符祉  
錄將以贊時雍

漢魏六朝百三家集卷一百九



總校官庶吉士臣侍朝  
校對官中書臣張頃

謄錄舉人臣汪志伊

欽定四庫全書叢要

集部

漢魏六朝百三家集卷一百十

詳校官候選知縣臣吳甸華



欽定四庫全書薈要卷一萬九千七百三集部

集部

漢魏六朝百三家集卷一百十

明 張溥 輯

魏收集

詔

為武成帝以三臺宮為大興聖寺詔

門下皇居帝邑揆日瞻星仰雉有常几席斯在雖今古  
推移文質代變而成世作範義貴適時朕奄家四海作

享萬國當陽負扆深存庇庇濟下利物無忘懷抱昭仁  
訓俗不遺造次今臨嚮聽咸極崇廣宴息之所不足  
溫華每謂為之者勞居之者逸至於離宮別館有時遊  
幸耳目所及聊可忘懷而乃午門洞啟萬柱周架上迫  
雲漢下臨雷雨巧極金銅麗殫珠璧眷然長想良非宿  
心三臺並列蕪穢自久天保之末經構甫興仍創棟宇  
規模宏博有司過實近人逞功氓庶勞止糜費難量既  
非殿寢正所便為虛衛之地凝華生白經歷歲年不剪

茅茨事頗逼下卑其宮室有可庶幾顧茲侈麗豈伊寧  
處自魏朝失政九域崩離人神無主實求明聖我太祖  
獻武皇帝握茲乾紀執斯地綱懸持日月肅咤風雲紀  
忠貞以成務感靈徵而大造爰以克定之初躬圖道場  
之業神迹冥果理燭幽明朕嗣膺寶祚永惟家祉仰祇  
先志尚竦玄門忍展聿修之重念歸喜捨之大肌膚匪  
恠國城何寶期濟率土至於圓極可以三臺宮為大興  
聖寺此處極土木之壯窮丹素之妍奇怪備於剗削光

華畢於圓彩顧使靈心眸鑾神物并會真覺唯寂有感  
必通化為淨土廣延德衆心若瑠璃法輪常轉灑甘露  
於大千照慈燈於曠劫

為魏禪齊詔

三才剖判百王代興治天靜地和神敬鬼庇民造物咸  
自靈符非一人之大寶實有道之神器昔我祖宗應運  
奄一區宇歷聖重光暨於九葉德之不嗣仍離屯圮盜  
名字者遍於九服擅制命者非止三公主殺朝危人神

靡繫天下之大將非魏有賴齊獻武王奮揚靈武剋剪  
多難重懸日月更綴參辰廟以掃除國由再造鴻勲巨  
業無德而稱逮文襄承構世業逾廣邇安遠服海內晏  
如國命已康生生得性迄相國齊王緯文經武統茲大  
業盡叡窮幾研深測化恩隨冥運智與神行恩比春天  
威同夏日坦至心於萬物被大道於八方故百僚師師  
朝無私政經疏澤洽率土歸心外盡江淮風靡屈膝辟  
地懷人百城奔走關龍慕義而請好瀚漠仰德而致誠

伊所謂命世應期實撫千載禎符雜還異物同途謳頌  
填委殊方一致代終之迹斯表人靈之契已合天道不  
遠我不獨知朕入纂鴻休將承世祀籍援立之厚延宗  
社之算靜言大運欣於避賢遠惟唐虞禪代之興近想  
魏晉揖讓之風其可昧興替之禮稽神祇之望今便遜  
於別宮歸帝位於齊國推聖與能眇符前軌王者宣布  
天下以時施行

為齊文宣西討詔

朕厯數在躬志清四方叢爾秦隴久阻風化混一之事  
期在今日必當訓旅誓衆天動雲臨朕已下甲汾流沈  
船晉地便當躬率將士平陵王壁徑掩長安梟彼兕首  
雖藏山沒水終不縱赦朕與梁國舊敦好睦近聞其奸  
乃欲規謀宜令上黨王渙總勒熊羆星流風捲王者之  
言明如日月宜宣內外咸使聞知

冊

加齊王九錫冊文

於戲敬聽朕命夫唯天為大列畧宿而垂象謂地蓋厚  
疏川嶽以阜物所以四時代序萬類駢羅庶品得性羣  
形不天然則皇王統歷深視高居拱默垂衣寄成師相  
此則夏伯殷尹竭其股肱周成漢昭無為而治頃者天  
下多難國命如旒則我建國之業將墜於地齊獻武王  
奮迅風雲大濟艱危爰翼朕躬國為再造經營庶土以  
至勤憂及文襄承構愈廣前業康邦夷難道格穹蒼王  
縱德應期千齡一出惟幾惟深乃神乃聖大崇霸德實

廣相猷雖冥功妙實藐絕言象標聲示迹典禮宜宣今  
申後命其敬虛受王搏風初舉建旗上地庇民立政時  
雨滂流下識廉耻仁加水陸移風易俗自齊變魯此王  
之功也仍攝天臺總參戎律策出若神威行朔土引弓  
竄跡松塞無煙此又王之功也逮光統前緒持衡匡合  
華戎混一風海調夷日月光華天地清晏聲接響隨無  
思不偃此又王之功也逖矣炎方逋違正朔懷文曜武  
授略申規淮楚連城灌然桑落此又王之功也關峴衿

帶跨躡蕭條腸胃之地嶽立鵠跱偏師纔指渙同冰散  
此又王之功也晉熙之所險薄江雷迥隔聲教迷方未  
改命將鞠旅覆其巢穴威略風騰傾懾南海此又王之  
功也羣蠻跋扈世絕南疆搖蕩邊陲亟為塵梗懷德畏  
威向風請順傾陬盡落其至如雲此又王之功也胡人  
別種延蔓山谷酋渠萬旅廣袤千里憑險不恭恣其桀  
黠有樂淳風相攜叩款粟帛之調王府充積此又王之  
功也茫茫涉海世敵諸華風行鳥逝倏來忽往既飲醇

醪附同膠漆檀襄委仰竒獸銜尾此又王之功也秦川  
尚阻作我仇讐爰挹椒蘭飛書請好天動其衷辭卑禮  
厚區宇乂寧遐邇畢至此又王之功也江陰告禍民無  
適歸蕭宗子弟尚相投庇如鳥還山猶川赴海荆江十  
部俄而獻割乘此會也將混來方此又王之功也天平  
地成率土咸茂禎符顯見史不停筆既連百木兼呈九  
尾素過秦雀蒼比周烏此又王之功也搜揚管庫衣冠  
獲序禮云樂云銷沉俱振輕徭徹賦矜獄寬刑大信外

彰深仁遠洽此又王之功也王有安天下之大勲加以  
表光明之盛德宣贊洪猷以左右朕言昔旦奭外分毛  
畢入佐出內之任王宜總之人謀鬼謀兩儀協契錫命  
之行義申公道以王踐律蹈禮軌物蒼生圓首安志率  
心歸道是以錫王大路戎路各一元牡二駟王深重民  
天唯本是務衣食之用榮辱所由是用錫王袞冕之服  
赤舄副焉王深廣惠和易調風化神祇且格功德可象  
是用錫王軒懸之樂六佾之舞王風聲振赫九域咸綏

遠人率俾奔走委賓是用錫王朱戶以居王求賢選衆  
草萊以盡陳力就列固非其人是用錫王納陛以登王  
英圖猛槩抑揚千品毅然之節肅是非違是用錫王虎  
賁之士三百人王興亡所繫制極幽顯紀行天討罪人  
咸得是用錫王鉄錢各一王鷹揚豹變寶扶下土狼顧  
鵠張罔不彈射是用錫王彤弓一彤矢百盧弓十盧矢  
千王孝悌之至通於神明率民興行感達區宇是用錫  
王秬鬯一卣珪瓚副焉禋欽哉其祗順往冊保弼皇家

用終爾休德對揚我太祖之顯命

禪齊帝冊文

咨爾相國齊王夫氣分形化物繫君長皇王遞興人非  
一姓昔放勲馭世沉璧屬旂重華握歷持衡擁璇所以  
英賢茂實昭晰千古豈盛衰有運興廢在時知命不得  
不畏天不可不受是故漢劉告否當塗順民曹歷不  
永金行納禪此皆重規襲矩率由舊章者也我祖宗光  
宅混一萬寓迄於正光之末奸孽乘權厥政多僻九域

離盪永安運窮人靈殄瘁羣迷滔天割裂四海國土臣  
民行非魏有齊獻武王應期授手鳳舉龍驤舉廢極以  
立天扶傾柱而鎮地剪滅黎毒匡我墜歷有大德於魏  
室被博利於蒼生及文襄繼軌誕光前業內剿凶權外  
摧侵叛遐邇肅晏功格上玄王神祇協德舟梁一世體  
文昭武追變窮微自舉跡藩旗頌歌總集入統機衡風  
猷弘遠及大承世業扶國昌家相德日躋霸風愈邈威  
靈斯暢則荒遠奔馳聲略所播而鄰敵順歎以富有之

資運英特之氣顧盼之間無思不服圖牒潛蘊千祀彰  
明嘉禎幽秘一朝紛委以表代德之期用啟興邦之迹  
蒼蒼在上照臨不遠朕以虛昧猶未逡巡靜言愧之坐  
而待旦且時來運往媿舜不暇以當陽世革命改伯禹  
不容於北面況於寡薄而可踟蹰是以仰協穹昊俯從  
百姓敬以帝位式授於王天祿永終大命格美於戲其  
祇承厯數允執其中對揚天休斯年千萬豈不盛歟

啟

上魏書十志啟

臣收等啟昔子長命世偉才益堅冠時特秀憲章前誥  
裁勒墳史紀傳之間申以書志緒言餘迹可得而聞叔  
峻刪緝後劉紹統削撰季漢十志實範遷固表蓋闕焉  
曹氏一代之籍了無具體典午終世之筆罕云周洽假  
復事播四夷盜聽間有小道俗言要竒好異考之雅舊  
咸乖實錄自永嘉喪圯中原淆然偏偽小書殆無可取  
魏有天下跨踪前載順末克讓善始令終陛下極聖窮

神奉大屈已顧盼百皇指掌萬世深存有魏撫運之業  
永念神州人倫之緒臣等肅奉明詔刊著魏籍編紀次  
傳備聞天旨竊謂志之為用網羅遺逸載紀不可附傳  
非宜理切必在甄明事重尤應標著搜獵上下總括代  
終置之衆篇之後一統天人之迹褊心未識輒在於此  
是以晚始撰錄彌歷炎涼採舊增新今乃斷筆時移世  
易理不刻船登閣含毫論叙殊致河溝往時之切釋老  
當今之重藝文前志可尋官氏魏代之急去彼取此敢

率愚心謹成十志二十卷請續於傳末并前例目合一  
百三十一卷臣等妨官秉筆迄無可採塵蹟旒冕墮深  
水谷謹啟

移文

為侯景叛移梁朝文

夫化成萬物分界九道紀之以山河照之以日月方足  
圓首含氣呈形咸總之於聖人畢會之以朝市皇魏應  
銜甲之祕圖納封金之寶命萬方為宅四海為家卜世

靈長將踰八百天壤之間朝不別焉唯夫三江五湖九  
蠻百濮其地如掌人鳥未分瞻星昧環拱之方托水迷  
朝宗之義積蠅為衆長蛇稱長石田無菽粟之用衆人  
非聲教所孚是以年歷三偽棄而不有豈力不足蓋所  
未徵而陸梁塗泥時軼彊鄙天討所遺理存惡殺自二  
紀及茲中原多故未清區宇文武兼勤偃伯歸戰有懷  
勞止將令動植俱仰堯心遂冠蓋括途象胥提告推誠  
蹶然類識王道授衣禮節拜首歸仁舞戚所以為高止

故能稱大方知風沙交臂不待兵車有苗納款未勞  
征伐而庸夫為善希能令終狂人克念更知徒語聞利  
無匹夫之信好虐有助鬼之心白頭為賊曾莫自揆嘉  
文浮功甘於苟得罔顧榆次之禍詎識江浦之禽侯景  
一豎微蔑民斯下矣人倫士操本自不倫直以少從羈  
勒頗習趨走叨忝名器事出爾朱藏情誦笑唯利是視  
義兵同舉羣胡覆族雖孤祭首丘事非小人而忘恩背  
本景為先至不義不信自此可知但丁公之戮時有未

可也大澤深山龍蛇並育遂容其悔非棄其瑕穢任以將率授以兵符庶其被鞍銜鍊盡力馳驟指踪投縲駕免或擒而弱才負重折足是慮置之不爭之地虛出韓鄭之間曾無戰伐之勤可言摧陷之績歲徃年徂率無可紀而腹心羣小信納逋亡刦奪行道侵掠民庶流聲遠聞王法有典驄馬將出朱筆且行自貽伊戚了不知咎盜憎主人乃圖逆節拔本塞源委身賊虜逼脇居民翻蕩城池义手曲躬千里唯諾殘賊相依忻同鱗水寵

以大位屬以東方外曰臣主內深骨肉安危契闊約以  
死生拯其鼎鑊之命全其齧粉之福時不暇決翻然易  
慮還相掩擊事劇仇讐言反覆剽獲莫非此類至於老母  
暮倚少弟升岡妻望行夫子號出父食毛之屬可為痛  
心哉景忽之如草芥棄之如塵垢任其斲截之誅安其  
烹斬之痛放麑食子有以可親觀臧窮否耻其並主獸  
心人面華裔同讐歸家懼執法之刑赴賊反噬臍之釁  
首領無地進退數窮遂騁邪說自託左右苟有君子義

均逐雀而彼方上下樂禍好亂叛竊之豎獲毒之人圖  
浮芥之小利忘丘山之大禍乃崇飾土偶被以玄黃馳  
馬高蓋載巖為重委以專征施其爪角驅逼子姓率我  
叛亡逼厭虐之侶鞠苦後之衆蟻攢蚋集侵竊邊鄙恤  
患分灾本不要於違僻違衆悖禮益神明之所誅皇帝  
垂旒華土則天而動卷覆三古懷佩百王掌握中道崇  
基增構殊塗全會百慮一歸中外禔福戎華俱庇持秋  
霜夏震之威以拔山超海之力顧指則風雲總至迴眸

而山嶽削平雖復旗鼓所臨有征無戰猶以師出而服  
辱在我世所務者息民所存者文德豈復以擒將威敵  
漂杵溺駒為功於一時示武於千載且天生五材有聞  
前古禍非我貽其得已乎遂置壇命將持柯畢禮引營  
就道分途競馳批熊舉輪之士翹關扛鼎之卒被組橫  
矛執殳挺劔龍駒並躍驥子千羣沸暭天壤蒸鬱雲霄  
一朝指揮倏忽千里候騎羅絡聊逞前驅天兵之鼓未  
鳴衆軍之旗詎接而荆揚烏合一朝崩解塞州滿野馘

耳截鼻以千萬計不可勝數宗親節將咸見擒束委命  
軍吏憂在釁鼓楚兵吳甲積若山丘青鵠赤烏喧流斷  
屹千金之貴為我資焉痛辱可哀其利安在覆師喪旅  
禍本可尋方之噬臍悔之靡及皆侯景叛戾虛相陷誘  
指成提挈之舉終無犄角之勢景棄本趨末背國違鄉  
部下數千屈逼羅網離親懷土一日三秋拘網立匏朝  
不謀夕豈能搖足東上遠赴彭城天奪彼魄信納虛詭  
使蕭明貴孫面縛於徐泗景為凶藪逡巡而坐觀託人

七尺之身居人成敗之地急病讓醫固若此也兩端自見故態未除今知東南滌蕩睢涖清復梁之喪師單輪不返擊援之期終當無日勢窮路盡憂在滅亡事留變生將謀及已且彼軍殲殄江淮屠酷禍源釁迹景實為之上懼金陵君長致請設之責下恐荆吳子弟洗父兄之冤愚小猜驚將興異計乘專任之機藉方面之重必當招結僉楚扇合無賴內自封植外絕防禦因見信而類起出不疑以竊發事比疾雷理同激矢上或憑陵乘

疾專擅縱橫下則鷗峙淮淝覬覦叛渙老疾姦回不虛然也而彼土區區厚加崇納置之襟帶之方處以藩籬之所費金帛於烈火罄酒漿於漏卮非乘景虛聲委其實用夫量材授任必原其始考行責成當存其大景豺聲蜂目之首狼心狐魅之徒義無父子棄同即異捐親背德於我尚反目而去在梁則何施可懷且我重傷心尾大不掉魚脫於淵義彰老氏而假威凶險授柄姦回欲求肝膽之誠更啟危亡之兆固知者不為迷者遂去

若抽薪止沸剪草除根壺首囊頭义手械足返國姦於  
司敗歸侵地於元武非直惡之在今天道人事實棄無  
禮苟違之者其長世何若悔非知罪恭承德普且欲飛  
驛合符班師凱入悠悠水鄉有救其死若乃執飾非之  
辨固遂過之失便當盡常勝之戰極必取之攻飛江南  
渡深山將恐削壤卑名雖頓頽而不獲亡宗滅廟望喬  
木而可悲昔田假英人於期壯士窮而歸我許以入懷  
景竦悖狗子攬亂四國庸可紓難棄若孤鵠何足戀戀

於亂臣勤勤於賊子也王者之威必厲如霜雪信同寒暑言猶麗天移至深念變通熟量可否幸思大雅無貽後悔

為東魏檄梁文

觀夫辰象麗天山岳鎮地方以類聚物以羣分建之以邦國樹之以君長自月於是莫二宇宙所以總一雖五運相推百王革命此道之一作所行孰之能改一作孰云能易而皇家承統光配彼天義洽幽明化周動植崇文德以來

遠修禮讓以止訟舞干戚於兩階執玉帛於萬國玄功  
潛運至德旁通百姓日用而不知兆民受賜而無迹唯  
彼吳越獨阻聲教匪民之咎責有由焉而元首懷止戈  
之心上宰薄兵車之會遂解紮南冠喻以好睦舟車遵  
沂州陸同光亭檄息奔走之勞屯戍無逼卒之變雖嘉  
謨長算爰自我始而罷兵息民彼獲其利侯景暨子本  
無事業乃枉道於人間遂乾沒於世上嗚伏於爾朱之  
門鎮守於普泰之日曾無為主之識詎有挈瓶之智既

而投命義旗歸身幕府殊異雍齒有類丁公時逢寬政  
得免大戮棄其瑕滓收其力用預在行伍參跡驅馳及  
秦隴逋誅每事經略以河南是空虛之地漢陽非兵戰  
之衝薄存犄角聊示旗鼓豈資實効寄以遊聲軍機催  
勒蓋維景任總兵統旅則有司存而愚褊有積驕憤遂  
甚屢犯軍紀自生疑貳禍心潛構翻成亂階負恩棄德  
罔恤天討不義不昵厚而必顛委慈母似脫屣棄寵弟  
如遺芥龍鍾稚子痛苦成行變彼諸姬破亡為伍滅伯

春之婉轉慕姜兒之爽言不與狼虎同仁而共豺羆等  
惡及遠託關隴依憑姦異逆主定君臣之分賊臣結兄  
弟之親解其倒懸仰人鼻息豈曰無恩終成難養俄而  
易慮躬擐干戈釁暴惡盈側首無託以金陵逋逃之數  
江南統御一作流離之地甘辭卑體進熟圖身讒言浮說抑  
可知矣叛豎投命豈將擇音而偽朝大小幸灾忘義主  
荒於上臣蔽於下逐雀去草曾不是圖竊寶叛邑椒蘭  
比好人而無禮其能國乎亦既失信不亡何待今帝道

休明皇猷允塞四民樂業百靈効祉故丞相材標國楨  
道潤時雨義冠伊霍勲蓋桓文大君立德世功世祿作  
民舟楫為國棟梁內外齊心上下同德蛟騰虎嘯風生  
雲起摩日則車懸轉舍排山則龍門洞開吞雲夢於胸  
中運天下於掌內雖有賊臣去國亡卒出境何異一毛  
之落牛體雙鳬之飛海曲彼既連結姦惡斷絕鄰好追  
兵保境縱盜侵國益物無定方事無常勢或乘利而受  
害或因得而更失是以吳侵齊境遂致勾踐之師趙納

韓地終有長平之役矧乃鞭撻疲民侵軼徐部築壘擁  
川捨信邀利此而可忍孰不可懷是以援乘麾殞之將  
投石拔距之士深衛偽主信納亡叛含怒作色如赴私  
讐意存涉血義不旋踵攻戰之利實若有神徵兵聚衆  
依山傍水舉螳螂之斧被皓蟬之甲當窮轍以待輪坐  
積薪而候燎及其鋒刃斃援堠塵旦接便已亡戟棄戈  
土崩瓦解貞陽以從一作猶  
子之親為戎首之任非獨一復  
但力屈道窮亦將無路還蜀兼亦一作挾子垂翅俱在

籠樊將士以昧禍之心為助亂之事皆掬指舟中披甲  
鼓下同宗異姓纍纍相望曲直既殊強弱不等父出子  
孤自取其敗違卜復諫何以辭責雖復貪利苟得背同  
即異獲一人而失一國見黃雀而忘深穿食鈎吻以療  
饑飲鳩毒以救渴智者所不為仁者所不向誠既往之  
難逮猶將來之可追景以鄙俚之夫遭風雲之會位登  
三事邑啟萬家揣身量分久當止足而周章向背離披  
不已天豈徒然意亦可見彼乃示之以利器誨之以慢

藏使其勢得容姦令其時堪乘便既南風不競天亡有  
徵老賊姦謀將復作矣然則摧堅强者難為功拉枯朽  
者易為力計其雖非孫吳猛將燕趙精兵猶是久涉行  
陣曾習軍旅豈同輕剽之師不比危脆之衆距一作拒此

則作氣不足攻彼則為勢有餘恐尾大於身踵鹿麌於股  
倔強不掉狼戾難馴呼之則反速而釁小不徵則叛遲  
而禍大會應遙望廷尉不肯為臣自據淮南亦欲稱帝  
但恐楚國亡猿禍延林木城門失火殃及池魚橫使漢

江一作黃士荆揚人物死亡矢石之下支

一作天

折露霧

之中彼梁主操行無聞輕險有素工用其短以少為多  
反覆山淵顛倒冠屨射爵論功盪舟稱力年既老矣耄  
又及之政荒民流禮崩樂壞改換朝章變易官品雖世  
異漢朝而事同新室加以用捨乖方立廢失所矯情動  
衆飾智驚愚毒螫滿懷妄敦戒業躁競盈胸謬治清淨  
內恣鷙靡外逞殘賊人人厭苦家家思亂灾異降於上  
怨讐興於下履霜有漸堅冰且至恃浮一作躁之風俗

任輕薄之子孫朋黨路開兵權在外必將禍生骨肉難  
起腹心強弩衝城長戟指闕徒探雀轂無救府藏之虛  
空伺熊蹯詎延晷刻之命外崩中潰今實其時鶻蚌相  
危一作扼我乘其弊方使高旗舒旆長轂啟行迅騎追風  
精甲耀日四七並列百萬為羣風飄雲動星羅海運以  
此赴敵何敵不摧以此攻城何城不陷猶為岓上之虎  
當作水中之龍以轉石之形為破竹之勢將使鍾山渡  
江青蓋入洛荆棘生建業之宮麋鹿遊姑蘇之館但恐

兵車之所轘轢劍騎之所蹈踐杞梓於焉傾折竹箭以  
此摧殘若吳之王孫蜀之公子順時以動見機而作面  
縛銜璧肉袒牽羊歸款軍門委命下吏當使焚櫬而出  
拂席相待必以楚材將為晉用固乃喜得異度實自利  
獲士衛士龍即援客卿之族將加驃騎之號斯蓋壯士  
封侯之日丈夫立節之秋冬永可折時不再來先事預  
懷有如皎日王侯無種工拙在人凡百君子勉求多福  
若不改迷坐待淪沒一旦暴骨草莽流血成川猶且不

悟噬臍何及故宣往意馳此簡書檄之到彼咸共申省  
此作是杜弼所製據藝文稱魏收作今姑存之

書

與李德林書

叔與陽休之論齊書起元事  
勑集百司會議叔與德林書

前者議文總諸事意小如混漫難可領解今便隨事條列幸為留懷細加推逐凡言或者皆是敵人之議既聞人說因而探論耳

重遺李德林書

惠示二事感佩殊深以魯公諸侯之事昨小為疑息姑不書即位舜禹亦不言即位息姑雖攝尚得書元舜禹之攝稱元理也周公居攝乃云一年救亂似不稱元自無大傳不得尋討一之與元其事何別更有所見幸請論之

議

皇太子西面議

天保元年皇太子監國在西林園冬會羣議  
皆東面二年於北城第內冬會又議東面陸

印疑非禮魏  
叔改為西面

去天保初皇太子監國冬會羣官於西園都亭坐從東  
面義取於向中宮臺殿故也二年於宮冬會坐乃東面  
某竊以為疑前者遂有別議議者同之邢尚書以前定  
東面之議復申本懷此乃國之大禮無容不盡所見收  
以為太子東宮位在於震長子之義也案易八卦正位  
向中皇太子今居北城於宮殿為東北南面而坐於義

為背也前者立議據東宮為本又案東宮舊事太子宴會多以西面為禮此又成證非徒言也不言太子常無東南二面之坐但用之有所至如西園東西所不疑也未知君臣車服有同異之議闕為而發就如所云但知禮有同者不可令異不知禮有異者不可令同苟別君臣同異之禮恐重紙累札書不盡也

文

枕中篇

叔以子弟少年申  
以戒厲著枕中篇

吾曾覽管子之書其言曰任之重者莫如身途之畏者  
莫如口期之遠者莫如年以重任行畏途至遠期惟君  
子為能及矣追而味之喟然長息若夫嶽立為重有潛  
戴而不傾山藏稱固亦趨負而弗停呂梁獨浚能行歌  
而匪惕焦原作險或躋踵而不驚九陔方集故眇然而  
迅舉五紀當定想窅乎而上征苟任重也有度則任之  
而愈固乘危也有術蓋乘之而靡恤彼其遠而能通果

應之而可必豈神理之獨爾亦人事其如一嗚呼處天  
壤之間勞死生之地攻之以嗜欲牽之以名利梁肉不  
期而共臻珠玉無足而俱致於是乎驕奢仍作危亡旋  
至然則上智大賢唯幾唯哲或出或處不常其節其舒  
也濟世成務其卷也聲銷迹滅玉帛子女椒蘭律呂謗  
諛無所先稱肉度骨膏脣挑舌怨惡莫之前勲名共山  
河同久志業與金石比堅斯益厚棟不撓遊刃砉然逮  
於厥德不常喪其金璞馳騖人世鼓動流俗挾湯日而

謂寒包嶢壑而未足源不清而流濁表不端而影曲嗟  
乎膠漆謂堅寒暑甚促反利而成害化榮而就辱欣戚  
更來得喪仍續至有身禦魑魅冤沉狴獄詎非足力不  
彊迷在當局孰可謂車戒前傾人師先覺聞諸君子雅  
道之士遊遨經術厭飫文史筆有奇鋒談有勝理孝悌  
之至神明通矣審道而行量路而止自我及物先人後  
己情無繫於榮悴心靡滯於慍喜不養望於丘壑不待  
價於城市言行相顧慎終猶始有一於斯鬱為羽儀恪

居展事知無不為或左或右則髦士攸宜無悔無吝故  
高而不危異乎勇進忘退苟得患失射千金之產邀萬  
鍾之秩投烈風之門趣炎火之室載蹶而墜其貽宴或  
蹲乃喪其貞吉可不畏歟可不戒歟門有倚禍事不可  
不密牆有伏寇言不可或失宜諦其言宜端其行言之  
不善行之不正鬼孰彊梁人因徑廷幽奪其魄明天其  
命不服非法不行非道公鼎為已信私玉非身寶過緇  
為紺踰藍作青持繩視直置水觀平時然後取未若無

欲知止知足庶免於辱是以為必察其幾舉必慎於微  
知幾慮微斯亡則稀既察且慎福祿攸歸昔蘧瑗識四  
十九非顏子幾三月不違跬步無已至于千里覆一簣  
進及於萬仞故云行遠自邇登高自卑可大可久與世  
推移月滿如規後夜則虧槿榮於枝望暮而萎夫奚益  
而非損孰有損而不害益不欲多利不欲大唯居德者  
畏其甚體真者懼其大道尊則羣謗集任重而衆怨會  
其達也則尼父栖遑其忠也而周公狼狽無曰人之我

狹在我不可而覆無曰人之我厚在我不可而咎如山  
之大無不有也如谷之虛無不受也能剛能柔重可負  
也能信能順險可走也能知能愚期可久也周廟之人  
三緘其口漏卮在前欹器留後俾諸來裔傳之座右

為齊即位告天文

皇帝臣諱敢用元牡昭告於皇皇后帝否泰相沿廢興  
迭用至道無親應運斯輔上覽唐虞下稽魏晉莫不先  
天揖讓考歷歸終魏氏多難年將三十孝昌已後内外

去之世道橫流蒼生塗炭賴我獻武拯其將溺三建元  
首再立宗祧掃絕羣凶芟夷奸宄德被黔黎勲光宇宙  
文襄嗣武勅構鴻基功浹寰宇威稜海外窮髮懷音西  
寇納款青丘保候丹穴來庭扶翼危機重匡頽運是則  
有大造於魏室也魏帝以卜世告終上靈厭德欽若昊  
天允歸大命以禪於臣諱夫四海至公天下為一總民  
宰世樹之以君既川嶽啟符人神效祉羣公卿士八方  
兆庶僉曰皇極乃顧於上魏朝推進於下天位不可以

暫虛遂逼羣議恭膺大典猥以寡薄託於兆民之上雖天威在顏咫尺無遠循躬自省實懷祗惕敬簡元辰升壇受禪肆類上帝以荅萬國之心永隆嘉祉保祐有齊以被於無窮之祚

北齊三部一切經願文

三有分區四生稟性共遊火宅俱淪欲海所以法王當洲渚之運覺者應車乘之期導彼沈迷歸茲勝地自寶雲西映法河東瀉甘露橫流隨風感授皇家統天尊道

崇法拔羣品於有待驅衆生於不二所以刻檀作續構  
石彫金遍於萬國塵沙數等復詔司存有事緇素精誠  
踰於皮骨句偈盡於龍官金口所宣總勒繕寫各有三  
部合若干卷用此功德心若虛空以平等施無思不洽  
藉我願力同登上果

祭文

祭荊州刺史陰道方丈

維太昌元年十二月庚申朔越十二日辛未友人鉅鹿

魏收謹以清酌少牢之饌敬祭于荊州刺史陰君之靈  
嗚呼哀哉惟君世載不殞英聲在茲風流有屬自爾弘  
之孝為行本忠實身基既言斯立罄禮窮詩器則清賞  
才惟英博於暢風雷蕭條丘壑願言朝市忘懷淡薄比  
契沉冥均情寂寥往塵守官及爾同僚墳墓合韻琴瑟  
俱調丹墀踵武清道齊蹤跡淪閑曠心共津濠乃眷平  
生相忻同趨殷勤宴喜流連辭賦溢矣不追長違世務  
詠歌徒在音徽空樹昔猶肢體與子裘裳今其往也生

死殊方形骸何促天地何長申茲沃醉贈以哀傷嗚呼  
哀哉

樂府

美女篇二首

楚襄遊夢去陳思朝洛歸參差結旌旆掩靄頓驂駢變  
化看臺曲駭散屬川沂仍令賦神女俄聞要虜妃照梁  
何足艷昇霞反奮飛可言不可見言是復言非

闕

我帝更朝衣擅寵無論賤入愛不嫌微智

瓊非俗物羅敷本自稀居然陋西子定可比南威新吳  
何為誤舊鄭果難依甘言誠易汚得失定因機無憎藥  
英妒心賞易侵違

永世樂

綺窗斜影入上客酒湏添翠羽方開美鉛華汗不霑  
門今可下落珥不相嫌

櫂歌行

雪溜添春浦花水足新流桃發武陵岝崿拂武昌樓

挾琴歌

春風宛轉入曲房  
兼送小苑百花香  
白馬金鞍去未返  
紅妝玉筯下成行

詩

後園宴樂

束馬輕燕外  
獵雉陋秦中  
朝車轉夜轂  
仁旗指旦風  
式宴臨平圃  
展衛寫屠穹  
積崖疑造化  
導水逼神功  
樹靜歸烟合  
簾疎反照通  
一逢堯舜日  
未假北山叢

喜雨

霞暉染刻棟礎潤上雕楹神山千葉照仙草百花榮瀉  
溜高齋響添池曲㟁平滴下如珠落波迴類璧成氣調  
登萬里年和欣百靈定知丹甌出何湏銅雀鳴

看柳上鵲

背歲心能識登春巢自成立枯隨雨霽依枝湏月明疑  
是彫籠出當由抵玉驚間關拂條軟復振毛輕何獨  
離婁意傍人但未聽

晦日汎舟應詔

裊裊春枝弱，關關新鳥呼。  
棹唱忽逶迤，菱歌時顧慕。  
睿賞芳月色，宴言忘日暮。  
游豫慰人心，照臨康國步。

月下秋宴

此夕甘言宴，月照露方塗。  
使星疑向蜀，劒氣不關吳。  
良交契金水上，客慰薦蘇何必應。  
劉輩還來遊，鄴都。

五日

麥涼殊未畢，蜩鳴早欲聞。  
喧林尚黃鳥，浮天已白雲。  
辟

兵書鬼字神印題靈文因想蒼梧郡茲日祀東君

庭栢

古松圖偃蓋新栢寫鱸峰凌寒翠不奪迎暄綠更濃如  
輕沈體咀實化稟容將使中臺虧違山能見從

蜡節

凝寒迫清祀有酒宴嘉平宿心何所道藉此慰中情

漢魏六朝百三家集卷一百十



總校官庶吉士臣侍朝  
校對官中書臣張墳

謄錄舉人臣汪志伊